

INUIT ATAQATIGIIT

Inatsisartuni



27. juni 2018

UKA 2018/40

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Kangerlussuarmi, Narsarsuarmi Kulusummilu innaallagissamut imermullu nunap sinnerani akinut naligiissarneqarnissaat pillugu Naalakkersuisut 1. Januar 2019-miit atuutilertussamik Mittarfeqarfiit aqqutigalugu naligiitseqqullugit peqquneqarnissaannik Inatsisartut aalajangiiffissaattut siunnersuut.

(Inatsisartunut ilaasortaq Aqqaluaq B. Egede, Inuit Ataqatigiit)

Tungavilersuut:

Nunatsinni akit assigiittussaanerisa atuutsinneqalersimanerannik oqartarneq ilumooqqissaanngilaq. Naluneqanngitsut Kangerlussuarmi Narsarsuarmi Kulusummilu innaallagissamut akit qaffasinnerujussuupput. Aamma taamatut ippoq Narsarsuarmi Kulusummilu imermut aki. Tamanna inuit nammaqatigiinnerattut oqaatigiuminaappoq.

Illoqarfinni, nunaqarfinni kiisalu inuit sineriammiittut tamarmik nammaqatigiillutik ikioqatigiillutillu atukkamikkut imminnut ilisarinnaanerat sapinngisamik annertusartuagassaavoq. Naalakkersuisummi oqaatigisartagaat tusartuagarput tassaavoq, Kangerlussuaq matuniannigilarput. Aammagoq Narsarsuaq matuniannigilaat.

Sumiiffinni taakkunani namminersortunngorsaaneq ingerlanneqassappat namminersortullu toqqammavigissaassappata innaallagissamut imermullu akit naapertuunnerusut tulluarnerusumillu inissinneqartariaqarput.

Siorna paasitinneqarnerput naapertorlugu Kangerlussuarmi, Narsarsuarmi Kulusummilu akinut nalimmassaaneq 5 mio. Kr.-nik naleqassasoq missingersuutigineqarpoq.¹

¹ Mittarfeqarfinniit tusarniaanermut akissut - Nukissiuuteqarnermut imermullu pilersuineramik immikkoortumut pilersaarummut – 2017 oqaaseqaatit

<https://naalakkersuisut.gl/~media/Nanoq/Files/Hearings/2017/Hoering%20af%20udkast%20til%20sektorplan%20for%20energi%20og%20vandforsyning/Answers/Mittarfeqarfiits%20hringssvar%20til%20sektorplan%20for%20energi%20og%20vandforsyningGRLSKdoc.pdf>

Taamaammat neriutigaara Inatsisartunut ilaasortat aammalu Naalakkersuisut siunnersuummut matumunnga tapersiissuteqarumaartut. Isummersoqatigiinnissaq angusaqarfiussasoq isumalluarlunga siunnersuut soqutiginarloq matumuuna saqqummiuppara.

Pisortanut aningaasatigut allaffissornikkullu kingunerisassai:

Mittarfeqarfiup naatsorsuutai naapertorlugit siunnersuut isertitaasussaagaluartuniit annaasaqaatitut ukiumut 5 mio. Kruuninik naleqassaaq. Taamaalillunilu Mittarfeqarfiup aningaasaqarneranut amigartoorutaasussatut sunniuteqassalluni.

Namminersortunut aningaasaatigut allaffissornikkullu kingunerisassai:

Narsarsuarmi Kangerlussuarmi Kulusummilu namminersorlutik inuussutissarsiuteqartunut oqilisaataassaaq, innaallagissamut aningaasartuutaasunut. Imermut tunngatillugu aningaasartuutitut Narsarsuarmi Kulusummilu oqilisaataassaaq. Kangerlussuarmulli imermut aki qaffalaartussatut inississaaq.

Qanoq tamakkiisumik aningaasartuutikillisaaffiusut, aningaasartuutaanerulersullu Kangerlussuarmi, Kulusummi Narsarsuarmilu apeqqutaalluinnassaaq sumiiffinni qanoq immikkut atutigitisogartigisarnersoq. Assersuutigalugulu suliffeqarfiup suut suliarisarnera apeqqutaalluni.

Innuttaasunut aningaasatigut allaffissornikkullu kingunerisassai:

Siunnersuutip kingunerisavaa Narsarsuarmi Kangerlussuarmi Kulusummilu innuttaasunut innaallagissamut aningaasartuutikillisaaneq. Kulusummi Narsarsuarmilu imermut aningaasartuutit annikillissapput. Kangerlussuarmili imermut aningaasartuutit qaffassallutik, imermut aki qaffattussanngussammat.